

## De MIEV unn aach onnern Audos

Omm letzde Sunndaach bin ich gonz uffgereecht onn de Stommdisch kumme. Ich hadd mich noch nit gesetzt, doo habb ich schunn gerufe: Ihr Männer, dass ich dess noch erlewe derrft: Ich habb ewe in Flerschem de MIEV gesehe.

De Mief?, sächt de Karl, den konnsde doch heechstens geroche hawwe, wo issen der herkomme? Odder hosde Bohnesupp gesse?

Mensch, Karl, habb ich gonz uffgereecht gesaat, de MIEV iss doch dess Elektroauto vom Mitsubischi. MIEV, Emm-ii-ee-vau, so heeßt dess unn dess fährt gonz ohne Sprit, nor elektrisch. Es geht los, ihr Männer, die Zukunft hott oogefonge, unn dess iss aach was ferr de Opel, der hott jetz doch aach e Elektroauto vorgestellt, was Ampera heeßt.

Moi Kumpels war nit so begeistert, die hawwe ihr Köpp geschittelt unn de Schorsch hott gesaat: Honnes, wer soll dann so Audos bezahle? Die werrn villeicht verzischdausend Euro kosde, wer bezahlt dann so vill Geld ferr so e Auto?

Die werrn schnell billicher, habb ich ze Antwort gewwe. Kennter eich noch erinnern? Zum Beispill die ersde Videorecorder, die Videokameras unn der ganze Krom, was die sellemols gekost hawwe? Unn oons, zwaa Jahr später warn die Dinger schunn so billich, dass aach unserooner sich enn Videorecorder unn e Videokamera kaafe konnt. So werrd dess aach mett dene Elektroautos, glaabt merrs.

Unn die Sach mettem Strom?, hott de Karl oigehakt, wo sollen der herkomme? Doo misse halt doch noch e paar Atomkraftwerke gebaut werrn, dass so Audos aach fahrn kenne. Odder mir misse de Strom ferr deier Geld in Fronkreich kaafe.

Naa, ewe nit, habb ich gesaat, aach doo hott die Zukunft oogefonge, guckt eich doch emol im Fernsehe unn in de Zeidunge oo, was ewe alles gemacht werrd. Windräder ...

De Schorsch hott mich unnerbroche: Windräder! – mett dene konnsde merr nit kumme. Ersdens verschonnele die die Lonschafte, zweidens stehn die die meist Zeit still unn drehe sich nit, drittens mache die wennse laafe enn mords Krach unn viertens schlaache die enn Haufe Veechel doot. Naa, soo Dinger wolle merr nit, gell Karl.

Schorsch, Karl, habb ich gesaat, ersdens wenss um die Veechel geht, dann missde merr aach die Audos stehe losse, weil wie vill Veechel werrn von dene dootgefahnn unn kooner reecht sich uff. Unn zweitens, die neie Windräder solle weit drauße in de Nord-unn Ostsee gebaut werrn, doo iss immer vill Wind. Aach gibts immer mehr Solarstromanlaache – kloone uff de Flerschemer Dächer unn riesisch große in de Wüste. Unn de VW will jetz so kloone Kraftwerke ferr de Keller baue, also aach ferr so Heisjer wie mir se hawwe, die kenne heize unn Strom mache. Glaabt merrs, in zwonzisch Jahr brauche mir koo Atomfabrike mehr, ess waaß sowieso kooner, wo der Abfall von dene hiesoll. Unn mir hawwe trotzdem genuch Strom ferr die Elektroautos.

De Schorsch wollt sich nit geschlaache gewwe. Die Dinger sinn doch so leise, die heersde nit kumme. Doo werrds nit long dauern unn e Kind odder enn Alde werrd dootgefahnn.

Ich habb gegrinst: Dess iss aach koo Problem. Weil in so Audos werrn e paar Lautsprecher oigebaut, die gewwe beim Fahrn so Geräusche von sich wie enn Porsche odder wie enn Ferrari. Glaabt merrs, wenn dess kimmt, dann sinn die Elektroautos nimmi uffzehalle, dann kaafe die junge Leit die wie verrickt.

Eiern Honnes